

Wolf - Rosenstein

I.

Ab lo pascor m'es bel q'eu chant
en estiu, a l'entran de mai,
can par la flors sobre·l verchant,
e son reverdezit li glai:
mout mi val pauc lo temps cortes,
q'eu non ai joi, ni non l'ades,
ni de sa compaignia no·m lau.

II.

Per qe d'amor an atretan--
li malvas, enojos savai--
con li meillor e·l plus prezan;
Jovenz, e Faig, fraing e dechai,
e Malvestatz a son luec pres
en amistatz, c'amics non es
amatz, ni d'amigua no·s jau.

III.

Ben sai qe lor es mal estan
als moilleratz, car se fan gai
domnejador ni drudejan;
e·l guizardos qe lor n'eschai
ditz el reprocher lo pajes:
qi glazi fai, a glazi es
feritz d'eis lo seu colp mortau.

IV.

Fals amador, al meu semblan,
vostr er lo danz, e no·n pueis mai;
de gran folor es acordan
can l'us l'autre gali?e trai;
e pos vos [o] aves enques,
drut, moiller et marit--tug tres--
sias del pechat comunau.

V.

El fuec major seretz creman,
al juzizi del derrer plai,
enganador fel desleian,
en la pena qe no trasvai,
on sera totz lo mals e·l bes
jutjatz, e [ja] no·m clam merces

donna c?aja drut desleiau.

VI.

Non a valor d?aissi enan
cela c?ab dos ni ab tres jai,
et ai! n'encor lo cor tristan
qe Dieus tan falsa non fetz sai;
miels li fora ja non nasqes,
enanz qe failliment f[ez]es
don er parlat tro en Peitau.

VII.

Saint Salvador, fai m?albergan
lai el regne on mi donz estai,
ab la genzor, si q?en baizan
sien nostre coven verai;
e qe·m do zo qe m?a promes;
pueis al jorn m?en ira[i] conques,
si be l?es mal al gelos brau.

VIII.

Amics, diguas li·m, can la ves,
si passa·l terme q?avem pres,
q?ieu soi mo[r]tz, per Sain Nicolau!

- letto 466 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911
CF 80209930587 PI 02133771002

Source URL: <https://letteraturaeuropea.let.uniroma1.it/?q=laboratorio/wolf-rosenstein-2>